

«Ոստիկանության Էլեկտրոնային համակարգերի կառավարման կենտրոն» պետական ոչ առևտրային կազմակերպություն ստեղծելու մասին» ՀՀ կառավարության որոշման նախագիծ

ՆԱԽԱԳԻԾ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

_____ 2022 թվականի N ____-Ն

«ՈՍՏԻԿԱՆՈՒԹՅԱՆ ԷԼԵԿՏՐՈՆԱՅԻՆ ՀԱՄԱԿԱՐԳԵՐԻ ԿԱՌԱՎԱՐՄԱՆ ԿԵՆՏՐՈՆ» ՊԵՏԱԿԱՆ ՈՉ ԱՌԵՎՏՐԱՅԻՆ ԿԱԶՄԱԿԵՐՊՈՒԹՅՈՒՆ ՍՏԵՂԾԵԼՈՒ ՄԱՍԻՆ

Հիմք ընդունելով «Պետական ոչ առևտրային կազմակերպությունների մասին» օրենքի 5-րդ հոդվածի 1-ին մասը, 9-րդ հոդվածը, 13-րդ հոդվածի 2-րդ մասը և «Կառավարչական իրավահարաբերությունների կարգավորման մասին» օրենքի 5-րդ հոդվածի 7-րդ մասը՝ Հայաստանի Հանրապետության կառավարությունը *որոշում է*.

1. Հիմնադրման միջոցով ստեղծել «Ոստիկանության Էլեկտրոնային համակարգերի կառավարման կենտրոն» պետական ոչ առևտրային կազմակերպություն (այսուհետև՝ Կազմակերպություն):
2. Սահմանել, որ՝

1) Կազմակերպությունը տեխնիկական միջոցների (տեսախցիկներ, ֆոտոխցիկներ, արագաչափ սարքեր և այլն) օգտագործմամբ վերահսկողություն իրականացնող և իրավախախտումներ ամրագրող, ինչպես նաև իրավախախտումների գործերով վարույթի նախապատրաստական աշխատանքներ իրականացնող կազմակերպություն է, որի.

ա. գործունեության նպատակն է օժանդակել իրավախախտումների նախականիմանը, հայտնաբերմանը, ամրագրմանը և դրանցով վարույթի իրականացմանը, ինչպես նաև Հայաստանի Հանրապետության ոստիկանության այլ լիազորությունների իրականացմանը,

բ. գործունեության առարկան է՝ տեխնիկական միջոցներ (տեսախցիկներ, ֆոտոխցիկներ, արագաչափ սարքեր և այլն) տեղադրելը, շահագործելը,

սպասարկելը (այդ թվում՝ վերանորոգելը), դրանց օգտագործմամբ վերահսկողություն իրականացնելը (այդ թվում՝ ճանապարհային երթևեկության նկատմամբ), իրավախախտումներ հայտնաբերելը, ամրագրելը, իրավախախտումների գործերով վարույթի նախապատրաստական աշխատանքներ կատարելը (ներառյալ՝ ապացույցներ հավաքելը, վարչական ակտի նախագիծ կազմելը):

2) Կազմակերպության գործունեության տարածքն ընդգրկում է Հայաստանի Հանրապետության տարածքը:

3. Թույլատրել Կազմակերպությանն իրականացնել ձեռնարկատիրական գործունեության հետևյալ տեսակները՝

1) տեխնիկական միջոցների (տեսախցիկներ, ֆոտոխցիկներ, արագաչափ սարքեր և այլն) և (կամ) դրանց մասերի, հանգույցների, ագրեգատների, դետալների արտադրություն և վերանորոգում,

2) տեխնիկական միջոցների (տեսախցիկներ, ֆոտոխցիկներ, արագաչափ սարքեր և այլն) և (կամ) տեղադրում, սպասարկում և դրանց տեղադրման կամ սպասարկման հետ կապված շինարարական աշխատանքների իրականացում,

3) սույն կետի 1-ին և 2-րդ ենթակետերում նշված գործունեության բնագավառում մասնագիտական ուսուցում, վերապատրաստում և մասնագիտական՝ ներառյալ իրավական խորհրդատվություն,

4) իր կողմից հավաքագրված օրենքով չարգելված տեղեկատվության (տեսանյութեր, լուսանկարներ և այլն) վճարովի տրամադրում:

4. Հայաստանի Հանրապետության և «Սեքյուրիթի Դրիմ» սահմանափակ պատասխանատվությամբ ընկերության միջև կնքված «Գույքի հավատարմագրային կառավարման» ԲԸԱՀԾՁԲ-03/2017 պայմանագիրը դադարելուց հետո Հայաստանի Հանրապետությանը փոխանցված գույքի կազմից Հայաստանի Հանրապետության օրենսդրությամբ սահմանված կարգով առանձնացնել կազմակերպության գործունեությունն ապահովելու համար անհրաժեշտ գույքն ու անժամկետ և անհատույց օգտագործման իրավունքով ամրացնել Կազմակերպությանը:

5. Հայաստանի Հանրապետության սեփականությունը հանդիսացողու Հայաստանի Հանրապետության ոստիկանությանն ամրացված՝ Երևան քաղաքի Չաքարիա Քանաքեռցու 74 հասցեում գտնվող՝ 0.11494 հեկտար մակերեսով հողատարածքը՝ 578.6 քառ. մետր և 241.8 քառ. մետր մակերես ունեցող շենքով ու շինություններով և Երևան քաղաքի Ջուղայի 1/9 հասցեում գտնվող՝ 0.276539 հեկտար մակերեսով հողատարածքը՝ 446.25 քառ. մետր, 288.32 քառ. մետր, 119.48 քառ. մետր, 68.11 քառ. մետր, 6.72 քառ. մետր, 161.8 քառ. մետր, 6.0 քառ. մետր և 14.92 քառ. մետր մակերես ունեցող շենքով ու շինություններով Հայաստանի Հանրապետության օրենսդրությամբ սահմանված կարգով հետ վերցնել ու անժամկետ և անհատույց օգտագործման իրավունքով ամրացնել Կազմակերպությանը:

6. Կազմակերպության կառավարումն իրականացնող լիազորված

պետական մարմին ճանաչել Հայաստանի Հանրապետության ոստիկանությանը և վերջինիս վերապահել «Պետական ոչ առևտրային կազմակերպությունների մասին» օրենքի 13-րդ հոդվածի 2-րդ մասի «գ», «դ», «ե» և «է» ենթակետերով նախատեսված, ինչպես նաև կազմակերպության մասնաճյուղեր և (կամ) ներկայացուցչություններ ստեղծելու լիազորությունները:

7. Հայաստանի Հանրապետության ոստիկանության պետին՝

1) սույն որոշումն ուժի մեջ մտնելուց հետո 3-օրյա ժամկետում «Սեքյուրիթի Դրիմ» սահմանափակ պատասխանատվությամբ ընկերությանը գրավոր ծանուցել Հայաստանի Հանրապետության և «Սեքյուրիթի Դրիմ» սահմանափակ պատասխանատվությամբ ընկերության միջև կնքված «Գույքի հավատարմագրային կառավարման» ԲԸԱՀԾՁԲ-03/2017 պայմանագրից հրաժարվելու և 90-օրյա ժամկետում պայմանագիրը դադարելու մասին,

2) սույն որոշումն ուժի մեջ մտնելուց հետո 1-ամսյա ժամկետում հաստատել Կազմակերպության կանոնադրությունը և ապահովել սահմանված կարգով Կազմակերպության պետական գրանցումը,

3) սույն կետի 1-ին ենթակետում նշված «Գույքի հավատարմագրային կառավարման» ԲԸԱՀԾՁԲ-03/2017 պայմանագիրը դադարելու մասին ծանուցելուց հետո 3-ամսյա ժամկետում հաստատել սույն որոշման 4-րդ կետով նախատեսված՝ Կազմակերպությանն ամրացվող գույքի կազմը և արժեքը,

4) սույն կետի 3-րդ ենթակետում նշված աշխատանքների ավարտից հետո 30-օրյա ժամկետում Հայաստանի Հանրապետության օրենսդրությամբ սահմանված կարգով ապահովել Կազմակերպությանն ամրացվող գույքի հանձնման-ընդունման աշխատանքների կատարումը:

8. Պետական գույքի կառավարման կոմիտեի նախագահին՝

1) սույն որոշումն ուժի մեջ մտնելուց հետո 2-ամսյա ժամկետում Հայաստանի Հանրապետության ոստիկանության պետի հետ համատեղ ապահովել սույն որոշման 5-րդ կետում նշված անշարժ գույքի հանձնման-ընդունման աշխատանքների իրականացումը.

2) սույն կետի 1-ին ենթակետում նշված աշխատանքների ավարտից հետո 20-օրյա ժամկետում Կազմակերպության հետ կնքել սույն որոշման 5-րդ կետում նշված անշարժ գույքի անհատույց օգտագործման պայմանագիր (այսուհետ՝ պայմանագիր)՝ դրանում նախատեսելով, որ պայմանագրի նոտարական վավերացման և պայմանագրից ծագող գույքային իրավունքների գրանցման ծախսերը ենթակա են իրականացման կազմակերպության միջոցների հաշվին:

9. Կազմակերպության պետական գրանցման և կնիքի ձեռքբերման հետ կապված ծախսերը ենթակա են իրականացման Կազմակերպության միջոցների հաշվին:

10. Սույն որոշումն ուժի մեջ է մտնում հրապարակմանը հաջորդող օրվանից:

**Հայաստանի Հանրապետության
վարչապետ**

Ն.Փաշինյան

2022 թ. _____ __ երևան